



Naalackersuisut siulittaasuata ammaanersiorluni oqalugiaataa tunngavigalugu ammaanersiorluni oqallinneq

(Naalackersuisut siulittaasuat)

Kiisami maani nikorfaqqilerpugut. Inatsisartunut qinersinermiit ukioq affaq qaangiutilerpoq, unalu Inatsisartut nutaat katersuunnerivaat siulleq Naalackersuisut nutaat peqatigalugit. Neriuppunga, pitsaasumik tatigeqatigiillutalu suleqatigiissasugut, nunamut tamarmut ineriartornermik siuariartornermillu pilersitseqataasinnaasumik.

Ajoraluartumilli neriulluarpallaanngilanga. Takuagut Naalackersuisugut, iluminni avissaartuutilereersut. Takuagut Naalackersuisut, sattallutik ingerlasut ineriartuutaasinnaasunillu ataasinnguamilluunniit eqqarsaateqanngitsut. Ilumullimi akерlerluinnaanik pipput. Malunnaatilimmik aaliangiinerit ikittunnguit, Naalackersuisut ulloq manna tikillugu isummiussimasaasa nunarput piitsuunerulersippaat aningaasatigullu siuariarnissamut periarfissat ersarissut aserorlugit.

Tassungalu ilaapput, Naalackersuisut matoqqassuseq qaqutigoorluinnartoq takutimmassuk. Takuagut Naalackersuisuni ilaasortat, ilanngutassiortunik oqaloqatiginnikkusunngivissortut aammalu imaalluni, allaaserisat amerlasoorpassuisuit ataanni allassimasartoq "Naalackersuisut allaaserisimasamut oqaaseqarnissartik kissaatiginnigilaat" imaluunniit "Naalackersuisunit oqaaseqartitsiniarneq iluatsissimangilaq".

Neriuppunga, maanna katersuunnitsinni tamatta ilisimanerulissagipput, Naalackersuisut ilumut suniarnersut. Pissaaneq sumut atorniarpaat? Nunaana inuiaqatigiillu qanoq ittut, pilersissallugit kissaatigineqartoq? Uanga qularutiginngilluinnarpara, nuna inuiaqatigiillu qanoq ittut, pilersitseqataaffigissallugit kissaatiginerlugu.

Nuna inuuffigerusutara tassaavoq inuup kiffaanngissuseqarnissaanut akisussaassuseqarnissaanullu pingaartitaqarluni sorsuuteqartoq. Nuna, nammineq qanoq iliuseqarusussusilinnik aammalu aallarnisaarusussusilinnillu suliaqartut isumassarsiaminnik anguniagaqartunik kaammattuisoq kissaatigaara. Nuna, inuuttaasut suliffeqarfiillu namminneq aningaasaataannik arsaartuinngitsoq, taamaasillutillu aningaasaliinermikkut ineriartortitsinissaminnik anguniagalik kissaatigaara. Kiisalu nunaqqatigut ilinniarnissamik eqqarsartut taamaasillutillu nunap ineriartortuarnissaanut sunniuteqarluarlutik inooqataanissaannut pilerinartoq kissaatigaara.

Aamma nuna pilersikkusutara tassaavoq "sanngiinnerusortaminik" paarsilluartoq. Nuna, innarluutilittaminik atorfissaqartutut misigititsisoq, innarluutilik suliffeqarsinnaaneramik periarfissiisoq kiisalu sumut tamanut innarluutilinnut tikinneqarsinnaasoq. Nuna, utoqqarnut sulillaarsimasunut qujamasuttoq, utoqqaallu toqqissillutik utoqqaanissaannut qulakkeerinnittoq. Nuna, meerartaminik illersuisoq, meeqqat atornerlunneqarnissaminnut annilaanganatik toqqissillutillu meeraanissaannut qulakkeerinnittoq. Kiisalu nuna, peqqinnissaqarfimmik eqaatsumik peqqissaartumillu ingerlatsisoq, paaqqutarinninnermik isumassuinermillu ukkatarinnittoq.



Tamakku tamarmik anguniarutsigit pilersaarusiortariaqarpugut. Iliuseqartariaqarpugut.

Aningaasarsiortariaqarpugut. Tamanna anguniarlugu qunusuilluta aalajangiisinnaasariaqarpugut. Aningaasaliinissatsinnut qunusuittariaqarpugut. Mittarfissuit assersuutissaqqipput. Sananeri akisuupilussuupput, kisianni aningaasaliiffigilluarneqarsimasutut sukkasuumik pisinnaavoq, takornarialerinermimmi inuussutissarsiornermut periarfissarpassuarnik pilersitsisussaammat. Assersuut alla tassaavoq aatsitassarsiorneq. Tamakkiisumik aalajangersimalluaqqissaarluta aatsitassarsiorneq naatsorsuutiginiisaanut qunusuittariaqarpugut. Suliffissanik pilersitsisussaavoq nunatsinnullu isaatitsilluassutaasinnaalluni. Uteqqissavarput; aatsitassarsiorfik avatangiisinut inuillu peqqissusaannut innarliisoq aallartinneqanngisaannartussaammat.

Eqqartugatsinnut atatillugu eqqamaasassarput tassaavoq, takornariaqarnikkut aatsitassarsiornikkullu suliffissanik pilersitsinikkut marloqiusamik pinnatassartaqarmat. Inunnut ataasiakkaanut inuunerannut pitsaasumik kivitseqataaginnarani – ikiorsiisutunik pisartagallinnut aningaasartuutigit aamma ikilisussaammata.

Aningaasaliinerit meeqqat atuarfiat pitsanngorsaavigisinnaalerannik kinguneqassaaq. Utoqqarnut innarluutilinnut aningaasat amerlanerusut atorsinnaalissavagut. Meeqqanik sumiginnaanerit akiorniarnernanut sulinermut aningaasat amerlanerusut atorsinnaalissavagut. Kiisalu suliffeqarfiit innuttaasullu aningaasaatitik paariinnaarnissaanut oqilisaanissatsinnut akileraarutunik akitsuutinillu appaanissamut aningaasat atugassavut amerlanerulertussaallutik.

Pineqartunut isummerneq uanga Demokraatillu isumaat malillugu kinguneqassaaq, ilorraap tungaanut ingerlalersugut ataasiakkaat pitsaanerusumik pisuujunerusumillu inuuneqarnissaannut aammalu ullut arlaanni politikikkikkut Kalaallit Nunaata namminiilernissaanik sinnattup piviusunngornissaanut.

Ajoraluartumilli asuliuungitsumik ilimanaateqarpoq, Naalackersuisut nutaat allamut ingerlasut. Toraagaq, inunnut ataasiakkaanut pitsaanerusumik inuunissamiit ungasillisitsisoq, aningaasaqarnikkut namminiilernissamut ungasillisitsisoq aammalu politikikkikkut namminiilernissamut ungasillisitsisoq.

Assersuusiupallalaarlanga.

1. Naalackersuisut aaliangersimapput, uuliasiornerit unitsinneqassasut. Uffa, uuliasiorneq milliartilikkaanik suli aningaasarsiorfiusoq, nunallu atugartuut Danmark aamma Norge siunissami suli ukiorpassuarni uuliasiornerit ingerlattussaagaat, aningaasarpassuarnillu isaatitsiffigalugu. Ilanngukkutsigit nunat atugartuunnginnerusut soorlu Saudi Arabien aamma Qatar, uuliasiornermit aningaasarpassuarnik isertitsisussat. Isumaqatigaara, uulia silap pissusaasut pitsaasuunngitsoq, kisianniliuna sooq, uagut kisitta Kalaallit Nunaanni, uuliasiuussanngitsugut? Immaqa uffa uagut sulinermut atukkanut pitsaanerusunik neqerooruteqarsinnaagaluartugut, akissarsianik pitsaanerusunik aammalu inuttut pisinnaatitaaffinnik soorlu Saudi Arabiami iliuseqarnerniik? Isumaqarpunga, Naalackersuisut pitsaasumik isertitsissutaasusaaq qatangiinnartikkaat uuliamik ujarlernissat uuliamilu tunisassiornerit unitsinnerisigut. Taamannallu isummernerup qularutissaanngitsumik kingunerissavaa, aningaasatigit nammineerluni napatinnissaagaluq politikikkikkullu namminiilernissaagaluq siunissamut ungasinnerusumut kinguarnissaa.



2. Naalakkersuisut uani katersuunnermi uranisiunngilluinnarnissap eqqunneqarnissaa siunnersuutigaat. Tupaallaatissaanngilaq, qineqqusaarnermi ersarissumik tamanna neriorsuutaamat. Kingunerissavaali, Kalaallit Nunaata aningaasaliiffigissallugu nalorninarninngussamat, taassuma takutimmagu, qinersinerinnakkut, misissoqqissaarinerit paaasinnaanerillu ingerlatseqatigiiffinnut aningaasaliisussanullu pitsaanngitsumik allanngorsinnaasut. Taamaaliornerup qanorluunniit kingunerissavaa, aningaasaliisussat allanut isigilernerat, aaliangiisussanngorunik, aningaasaatik sumut atorniarnelugit. Tamanna maani nunatsinni aatsitassarsiornermut aallarterlaamut ajoqutaassaaq. Aaliangernerup taassuma aamma ataatsimut isigalugu kingunerissavaa, aningaasatigut nammineerluni napatinnissaagaluap politikikkullu namminiilernissaagaluap siunissamut ungasinnerusumut kinguarnissaa.

Taakku marluk assersuutaannaapput. Inernerisassaalu maannangaaq ersarissereerpoq; aningaasaqarnermut politikki aamma aningaasatigut ineriartorneq partiinit Naalakkersuisuniitsunit – IA aamma Naleraq – kingunerissagaa, politikikkut namminiilivinnissaq pingitsuuissasoq. Taamaattumilluuna politikikkut namminiilivinnissamut tunngasunik partiini taakkunannga politikkerinik anninneqaraangat, oqaatsit imaqanngitsut pissarsivissaanngitsullu anninneqartartut.

Parti tapersersuisoq Atassut pilluaqqorusulerpara, taassuma partiip namminiilivinnissap pingitsoortinnissaa anguniangarilluinnarmagu Naalagaaffeqatigiinnarnissarpullu anguniagarimmagu. Atassut pilluarit – IA-p Naleqqallu sullippaasi.

Aalisarnermit isertitat qaffassassavagut

Isumaqarpunga, pissusissamisoortoq ullumikkut nunatsinni aalisartunut tamanut qjassupput annertoq ingerlateqqissallugu. Ilissi peqqutaallusi, aalisakkanik qalerualinnillu avammut tuniniaanitsinni nunatta karsianut aningaasarpassuarnik tapeeqataavusi. Ataqeqqaassi suliarujussuarsilu. Ilissi iliuuseqanngikkussi nunatut piitsuunerussagaluarpugut, aamma neriuutigalugulu upperaara, aalisarnerup siunissami ukiorpassuarni nunatsinni aningaasaqarniarnermut pitsaasumik annertuumillu tapertaalluarumaartoq.

Aammali upperaara, aalisarnek ineriartortissinnaagipput aningaasanillu amerlanerusunik isertitaqarluta. Taamaattumik qilanaaraara, Aalisarnek pillugu ataatsimiititaliarsuup isumaliuutissiisutaasa atuarnissaanut, tamatta ataatsimoorussamik aallaavigissagatsigu aalisarnermut inatsisip nutaap suliarinerata aallartinnissaanut. Inatsit nungusaataangisumik aalisarnissamik qularnaarinnittusaaq, aalisartunik ataasiakkaanik inuiaqatigiinnillu aningaasarsiorfissaaq. Aalisarnermut inatsimmik peqassaagut, nunatsinnut iluaqutaasumik – innarliinngitsumillu -.

Tassani pingaartuuvooq, aalisartut aammalu taakku misilittagaat tusarnaassallugit. Uanga aalisartut aalisagaqarneranut ilisimasaat ataqqisorujussuara. Taamaapporlu aalisartut ilisimasaannut, qanoq ililluni sunniuteqarluartumik nungusaataanngittumillu aalisartoqarsinnaaneranut.

Pingaartuuvorli aamma ilisimassallugu, aalisarnermut inatsisissamut kikkut tamarmik 100 procentimik iluarisimaarinnissinnaannginnerat. Allatut ajornartumik aalisartut inuiaqatigiillu soqutigisaat silatusaartumik naapeqatigiisinniartariaqassavagut. Taamaattumik pisassiissutit akitsuutillu aalisarnermut inatsimmi nutaami ima ilusilertariaqassapput, inuiaqatigiit inuussutissarsiutillu tamarmik iluaqutigisinnaasaannik. Aalisartugut allanngorartuunngitsunik atugaqartissavagut. Soorlu assersuutigalugu qulakkeerlugu, pisassiissutit tunniunneqartut tassanngaannaq utertinneqartassanngitsut.



Qulakkeerinnineq taanna atorneqanngippat, aningaaseriviit arlaannaataluunniit, angallatinut nutaanut sunniuteqarluarsinnaasut, millioninik taamannanik taarsigassarsiiumanaviangillat.

Erseqqissartariaqarparattaaq, aalisarnermut politikki isumaginninnermut- aamma sulinermut politikkiimiit immikkoortinneqassasoq. Eqqarsartaaseq qimattariaqarparput, soorlu assersuutigalugu aalisakkeriviit inissinneqassasut piffinni suliffissaaleqiffiunerusuni, tassani piffimmi sulisoqarnek ikorfartorniarlugu. Aalisakkeriviit piffinnut inissinneqassapput, tunitsivittut avammullu tuniniaanermut tulluarnerusunut. Taamaaliornikkut aningaasanik amerlanerusunik isertitsissaagut, pitsaanerusumik inuuneqalernissamut atugassanik imaluunniit akileraarutinik appaanissamut.

Suliassap taassuma aallartinnissaanut qilanaarpunga, neriuppungalu, Naalackersuisut suliame siusissukkut partiit peqataatissagaat.

Kikkut tamarmik pilliuteqassapput

Demokraatini una isumaraarput, inuiaqatigiinni ataqatigiinnermut pingaartuusoq, tamatta pilliuteqarnissarput, sapinngikkutta. Imatut isumaqarpoq, peqqikkaanni sulinissamulluunniit allatigut aporfeqarani sulilu soraarningorsimanani, sulinikkut imaluunniit ilinniagaqarnikkut pilliuteqassasugut.

Ullumikkut ajoraluartumik imaappoq, inunnik ilaqaratta, peqqissutsikkut sulisinnaagaluarlutik imaluunniit ilinniagaqarsinnaagaluarlutik, eqiasuinnartunik. Tamanna ajorluinnarpoq, uatsinnullu ataqqinninnginnermik takutitsinerulluni.

Aaqqissuussaanerput allanngortittariaqarparput, suligaanni ilinniagaqaraannilu qaqugukkulluunniit imminut akilersinnaasunngorlugu kinguneqartitsisalerlutalu, ataatsimoornermut pilliuteqarusunngitsunut. Pingaarnek uaniippoq, inunnut peqqissunut pisortanit ikorsiissutinik pinissaq pisariaqassanngitsaq pilliuteqaqataanngikkaanni. Allatut oqaatigalugu, pilliuteqaqqaartariaqarpoq pisortanit ikiorserneqarniaraanni.

Pilliuteqarneq sulititsinertut ittumik ingerlanneqarsinnaavoq, soorlu assersuutigalugu illoqarfimmi imaluunniit nunaqarfimmi eqqakkanik katersineq. Pulaartartuusinnaavoq utoqqalinersialimmut kiserliortumut. Imaluunniit atuarfimmi ulluuneraniluunniit paaqqinnittarfinni tapersersortitit.

Sulititsinerup siunertaa aamma imaassaaq, ullaakkut makinnissamut ilinniarneq, piffissaq eqqorlugu orniguttarnissamut aammalu ilinniarlugu, iluarisimaarnartuusoq, pilliuteqaqataaneq. Taassuma kingunerisariaqassavaa, suliffivimmik pissarsisinnaanermut imaluunniit ilinniakkamik aallartitsisinnaanermut kajuminnerulerneq.

Eqqaamatigu, kisitsisit takussaasut kingullit takutimmasuk, inuiaqatigiit 130.000 aamma 180.000 koruuninik sipaaruteqartartut innuttaasoq ataaseq isumaginninnikkut pisartagalik sulileraangat.

Tassunga atatillugu oqartariaqarpunga, tulluusimaarutigigakku, uagut Demokraatiniit sulinermut ilanngaatiip eqqunneqarneranut suleqataasimagatta, taassumalu kingunererpiarpaa, sulinerup pisortanillu pilersorneqarnerup assigiinngissutaata annertunerulernera. Tamanna pitsaalluinnarpoq, isumaqarluinnarpungalu, Naalackersuisut akileraartarnerup aaqqissuuteqqinneqarnissaanik nalunaaruteqarnerannut atatillugu qulakkiisagippat, sulinermut ilanngaatiip suli qaffasinnerulernera, suli



annertunerusumik sulinerup imminut akilersinnaanera pitsaanerulerniassammat taamatullu ataatsimoornermut pilliuteqartoqarluni inuiaqatigiillu inuulluataarnissaannut aningaasartuutitut iluaqutaassalluni.

Peqqinnissaqarfik pingartinneqassaaq

Demokraatit tulluusimaarutigaa, piffissami taama sivikitsigisumi, maannakkut Inatsisartunut ilaasortaq Anna Wangenheim peqqinnissaqarfimmi akisussaasuunerani, angusaqarnerput. Kræftimut katsorsaannermut periarfissat pitsaaningorsimapput, meeqqallu kigutitut narlorsaatinik passunneqartarnissaannut periarfissat eqquteqqillutigit.

Taakku saniatigut inooriaatsinut tunngasunut suliap annertuup pilersinneqarnissaanut aqutissiueqataasimavugut inooriaatsitsinnik aallaaveqartumik nappaatit pinaveersaartinnissaanut passunnissaannullu (Steno Diabetes Center), tassani ilisimatuussutsikkut katsorsaanerlu ataatsimuulissallutik, illumi nutaami angisuumilu. Taamaaliornikkut ilorraap tungaanut aallartoqassaaq innuttaasullu ataasiakkaat inuunermik sinnera attatassaminnik nappaammik inooqateqarnissaminnut periarfissat nukittorsarneqassallutik, pitsaasumik inuuneqassallutik sivilisuumillu nappaateqaraluarlutik inuusinnaassallutik. Naatsorsorneqarpoq, ukiut qulit tulliuuttut ingerlaneranni innuttaasugut inooriaatsitsinnik aallaaveqartumik nappaateqartut 10.000-it missaanik qaffassimassasut. Taamaattumik pingaaruteqarpoq suliniutip aallartinneqarnissaa.

Peqqinnerusumik inuuneqarnissamiinninni, isumaqarpunga, anguniagassaalluartoq, inuttut ataasiakkaatut peqqissutsitsinnut inuttut akisussaassuseqarnerunissarput. Inooriaatsimik aallaaveqartumik nappaatit amerlasuut pinngitsoortinneqarsinnaapput, nammineerluta inuunitsinnut akisussaasunngorutta. Naatsumik oqaatigalugu, pujortarunnaassaagut, peqqinnarnerusumik nerisaqassaagut, aalakoornartulinnik minnerusumik imigaqassaagut aalanerulerlutalu. Tamatta ataasiakkaarluta suliniuteqarutta Peqqinnissaqarfimmut aningaasartuutit annertoorsuarmik appartinneqarsinnaapput, taamatullu uagut inuttut ataasiakkaarluta pitsaanerusumik sivilisuumillu inuulluta.

Aningaasartuutimmi appartinneqartariaqarput, periarfissatigit. Ukiuni tulliuuttuni utoqqaat amerlingaluttuinnartussaapput nassatarissallugulu peqqinnissaqarfiup suliasaqarnerulernera. Pingaartupilussuuvoq, pissutsit pitsanngorsartuarnissaat katsorsaanerillu pitsanngorsartuarnissaat. Inuiaqatigiittut pisinnaasariaqarpugut napparsimasortatsinnik isumassuinissamut katsorsartariallillu katsorsarnissaannut.

Demokraatit qilanaaraat, Peqqinnissaq pillugu ataatsimiititaliarsuup innersuussuteqarnissaa, maannangaarli oqarusuppugut, peqqinnissaqarfimmi sulisussanik ilinniartitsinerunissaq pisariaqassasoq. Tassani pineqarput nakorsat peqqissaasullu. Taakku saniatigut pingaartuuvoq, nungusaataangitsumik allanngorartuunngitsumillu peqqinnissaqarfimmi pilersitsinissarput sulisussarsiornerup taakkulu attannissaat ukkataralugu. Aningaasat amerlavallaat suliarlorluni aammalu soraarnermi angalanernut atortarpagut, taakkulu kinguneraat, napparsimasut paaqqutarinerannut isumassorneqarnerannullu aningaasat atugassaasut ikinnerulerneru. Taamaattumik aamma sulisussarsiornermi Danmarkip nunallu avannarliit saniatigut nunanit allanit pissarsiortarnissaq ukkatarisariaqarparput, taamaaliorutta kipsaqattaangitsumik sulisitsinissaq annertunerusumik qulakkiissagatsigu, innuttaasunut



toqqisisimanermik pilersitsisussaq, sulisunik aalaakkaasunik paarlattaasussat aammalu peqqinnissamut tunngasunik neqeroorutitut nukinnik annerusumik pilersitsilluta.

Peqqinnissaqarfimmi pingaarnersiunerit aamma sakkortuumik ukkatarisariaqarpagut. Aningaasat amerlavallaat ullumikkut allaffissornermut atorneqartarput. Tamanna allanngortikkusupparput, akерlianik aningaasat sulitinniarpagut, malunnaatilimmik. Assaat kissalaartut annertuneramik ukkatarissavagut, taakkuummata ikiortissagut, nappaammik eqqorneqarutta.

Peqqinnissaqarfiup ingerlalluurtup qulakkiissavaa, tamatta toqqissisimalluta saaffiginnissinnaanissarput, paaqqutarineqarneq passunneqarnerlu pisariaqartitarput piumallugu. Pisariaqarpoq, nakorsat peqqissaasullu annertunerusumik napparsimasumut atassuteqarnissaat, annikinnerusumillu allaffissorinissaat. Oqimaaqatigiisitsiniarneq ajornakusoorpoq, iluaqutaanngilarli, Peqqinnissaqarfimmut aningaasaliuaralarutta. Annertunerujussuarmik ukkatarisariaqarparput, aningaasat eqqortumik atorneqarnissaat.

Aningaasat eqqortumik atorutsigit, uagullu inuttut ataasiakkaatut pitsaanerusumik peqqinnarnerusumillu inuuneqalerutta, peqqinnissaqarfeqalissaagut pitsaanerusumik, akisunerunngikkaluartumik.

Innuttaasut namminneq aningaasaatimik amerlanersaat tigummiinnassavaat

Demokraatinut pingaaruteqarluinnarpoq, Namminersorlutik Oqartussat kommunillu sunniuteqarnerulernissaat, pisortat ingerlatsiviini aningaasanik ikinnerusunik atuinissaq anguniarlugu. Isumaqarpugummi, innuttaasoq naliginnaalluinnartoq, nammineq sulinermigut akissarsiami amerlanersai pisortanut tunniuttarai akileraarutit- akitsuutillu aqqutigalugit.

Upperilluinnarparput, kalaallip nuannaarutigissagaa qaammatit tamaasa aningaasanik amerlanernik peqaleruni. Apeqqutaanngilaq aningaasat take-away-inut, oqarasuaatinut, sulinnigiffeqarluni angalanernut, soraarninngornissamut katersinermut, ajunngitsulioernut allarluiinnarnulluunniit atorpagit, uagut susassarinnigilarput. Pingaartortaali aana, inuup nammineq aaliangissammagu, qanoq nammineq aningaasaatimi atornissai.

Taamaattumik maannangaaq uani katersuunnermi siunnersuutigaarput pisiassat arlallit kalaallit tamarluinnangajammik atortagaasa akitsuutaasa appartinneqarnissaat. Taamaaliornerup qulakkiissavaa, ataasiakkaat namminerminnut aningaasaateqarnerulernerat.

Meeqqat inuusuttullu tamarmik toqqissisimasumik inuuneqassapput

Allatut ajornartumik meeqqavut, qanorlu innerat oqaluserisariaqarpagut. Qularutiginngilluinnarpara, partiit tamarmik isumaqatigissagaat, annertoorujussuarmik ajornartorsiutaasoq, meeqqat amerlavallaat angajoqqaaminnik sumiginnarneqartarnerat aqqissuussaansinnullu, uagut piorsakkatsinnit. Ilaannikkut soorlu imaattartoq, angajoqqaat ikiorneqarnissaat meeqqat ikiorneqarnissaanniit ukkatarineqarnerusarluni.

Demokraatit isumaqarput, piffissanngortoq, meeqqat siulliunnissaat – tamatigorluinnaq qaqugukkulluunniit. Meeqqat pisuussuteqanngillat sutigullu tamatigut ikiorneqarnissaat pisariaqarpoq.



Ingerlaannartumillu suliniartoqarnissaanut pisinnaatitaaffeqarlutik. Aqaguunngitsoq, sapaatip akunneraanngitsoq, qaammat qaangiuppaanngitsoq. MASSAKKORLUINNAQ.

Taamaattumik pakatserujussuarpunga Naalackersuisup meeqqanut sumiginnakkanut ikiuiniarnerminut pullavianut. Killeqanngitsumik iliuusissanik taakkartuisoqarpoq, illuatungiliuttuugallaramik aammalu qineqqusaarnermi, tamannali sumik kinguneqarsimava?

Siullermik paasisimavarput, naqqaniik allaffissuarmik nutaamik sananeq pingaarnerusoq tigussaasunik iliuuseqarnerminngarnik. Tullissaani Aningaasanut inatsisissatut siunnersuummi atuarsinnaasimavarput, sullissisussat ilinniarnerrannut aningaasat atussallugit pingaarnerusoq tigussaasunik meeqqanut sumiginnakkanut iliuuseqarnermit. Isiginnittaaseq taanna assorujussuaq pakatsissutigaara. Piviusormi ajoraluartumik imaappoq, Naalackersuisut nutaat meeqqanut sumiginnakkanut sunnguamilluunniit nutaanik iliuuseqarsimannngimmata. Iliuuseriniakkanik nutaanik soqanngilluinnarpoq. Ingasappallaaqaaq, aammalu taasariaqarluni sumiginnaaqqinnertut – massakkulli Naalackersuisunit.

Demokraatit piareersimapput annertuumik meeqqanik sumiginnaanerup akiorniarneqarneranut suliniuteqarnissaminut. Piareersimavugut siammasissumik isumaqatigiissuteqarnissatsinnut. Piareersimavugut aningaasartassaasa nassaarinissaanut. Kisiannili imaappoq, Naalackersuisut aallartitsinissamut pisinnaatitaaffeqarput. Uagut meeqqallu suli utaqqivugut, susoqarnissaanut. Manna kajumissaarutaali aallartinnissamut. Aqaguunngitsoq, sapaatip akunnera tulliuaniunngitsoq. MASSAKKORLUINNARLI.

Taamatut oqareerlunga, uannut pingaartuuvoq erseqqissassallugu, tamatta ataasiakkaarluta akisussaafferujussuaqaratta qulakkiissallugu, meeqqat tamarmik toqqissisimasumik pitsaasumillu inuuneqarnissaannut. Suli amerlavallaaqaat, sumiginnaanermik isiginngitsuusaarisut paatsoorlutik ilaqtaminnik imaluunniit ikinngutiminnik asattuussisunik. Tassani eqqaamassavarput, uagut ukkatarisarpurp unaajuartariaqarmat qulakkiissallugu, meeqqap kialluunniit pitsaasumik meeraanissaa. Tamatta pisussaaffeqarpugut angajoqqaat, angajoqqaatut pisussaaffimminnik pitsaanngitsumik ingerlatsisut, nalunaarutigissallugit. Tamanna atuuppoq annertunermik inunnut sullissisunut soorlu ilinniartitsisunut perorsaasunullu. Taakku qanorluunniit annikitsigisumik pasitsaassaqarunik sumiginnaasoqarsimasoq, erngerluinnarlutik iliuuseqartussaapput. Allatut iliorneq atorfimmik sumiginnaanerussooq.

Ilinniarsimanerup pisuunnguallatsissavaatigut

Meeqqatta ilinniagaqarnerat nukittorsassavarput, tamannalu atuarfinnik pitsaanerusunik sulilu pitsaanerusunik ilinniartitsisunik pisariaqartitsivoq. Atuarfiit illutaasa atuarnerullu pitsaassusai pitsaappata, atuartut pikkorissarnissaminut periarfissaat annertusassapput taamatullu ilinniarsinnaalissallutik suliffimmut, inuiaqatigiinnut tamarmut nukittorsaatissamik.

Pingaarnerpaarpaatut meeqqat atuarfiat nukittorsassavarput, meerartagut nunanut sanilliuttakkatsinni meeqqanut assigiimmik pikkoritsigilernissaannut periarfissillugit.

Ullumikkut imaappoq, suliffiit tamarluinnangajammik arlaatigut ilinniagaqarsimanermik piumasaaqatitaqarlutik. Taamaattumik pingaarnerugaluttuinnarpoq, tunngaviumik piginnaasat



piginissaat. Piginnaasat, meeqqat atuarfiannit pissarsiarineqartariaqartut. Ajoraluartumilli ullumikkut amerlavallaarput, meeqqat atuarfiannit anisartut piginnaasat pisariaqartut pigilersimanagit, tamannalu toqqaannartumik paasineqarsinnaavoq inuusuttut amerlavallaat suliffissaarussimaneratigut. Ajornartorsiut annertoorujorujussuavoq, iliuuseqarfigisariaqagarput.

Demokraatit isumaqarput, fagit matematik, kalaallisut, qallunaatut, tuluttut inuiaqatigiilerinerlu ukkatarineqarnerusariaqartut, fagit taakku pingaartuummata ilinniagaqarnermi ingerlariaqqinnissamut aammalu suliffittaarnissamut.

Kisiannili pingaarnarpaarppaaq unaagunarpooq, meeqqat atuarfiat pilersissagipput, atuartut atugarissaarnissaat qitiutillugu. Ilikkagaqarnarneruvoq, ilorrisimaaraanni. Tassunga atatillugu ukkatarineqarnerusussaaq unaavoq aalanerulerneq silamiinnerunerlu ilinniagaqarnissamut atatillugu. Taakkununga tunngatillugu atuarfiit nutaanik pilersitsisinnaassuseqartariaqarput. Timip aalatinnerunera atugarissaarnermut peqqissutsimullu pitsaassaaq, meeqqanillu inuusuttunillu nukittunerusunik pilersitsissalluni.

Suna tamaat ingerlaannaq allanngortissinnaanngilarput, aammali ilatsiinnarsinnaanata. Demokraatit Inatsisartuni ilaasortaata Nivi Olsen-ip uani katersuunnermi meeqqat atuarfiat pillugu arlalinnik siunnersuuteqarsimavoq, ataatsimut isigalugit ilorraap tungaanut saatsitsisussat. Ilaatigut naqinnernik ilisarinnissinnaannginnermut misissuut kalaallisoortoq, inuit pisinnaatitaaffii pillugit atuartitsineq aammalu meeqqat immikkut atuartinneqarnissaminnik pisariaqartitsisut ukkatarinerunissaat. Siunnersuutit taamaattut meeqqat atuarfiat ilorraap tungaanut saatsikkaartuaassavaat, soorunalumi neriutigaarput Inatsisartunit Naalakkersuisuniillu siunnersuutit taparserneqarnissaat.

Ammaanersiorluni oqallinnermut oqaasissagut taakkuugallarput. Inersuarmit apeqqutinut akissuteqarnissara qilanaaraara neriullunga pitsaasumik kinguneqartussamillu oqallittoqassasoq.